



*Sabtu, 11 Pebruari 2023*  
**Ogen: Kolose 3:10**



**TETAP IPELIMBARUI**



I bas jabu siibenaken alu alu sada arih sekalak dilaki ras diberu labo kuh. Dua kalak si berbeda latar belakang, biak, perayaken ipersada i bas sada perpadanen (komitmen) nggeluh seh metua i bas sada iketen. E maka si perlu ijaga e me labo ise si terbaik, simehulina tapi kuga duana nggeluh radu ras gelah teptep wari reh ulina. I bas jabu labo lit pertandingan ras persaingan tapi saling ngelengkapi. Ertina, duana arus rusaha mereken simehulina man pasangenna. Amin si megati jadi, erpengakap ia simehulina, ia si melalana erkorban, e maka melala kal tuntutan-tuntutan si kedungenna labo mpeteguhi perjabun e tapi erbahan lanai ernanam.

Bage me i bas renungenta paksa enda ipersingeti Paulus perpulungen Kolose gelah makeken manusia si mbaru si enggo ipelimbarui Dibata. Manusia si male, si dem alu biak doni, ikuasai dosa enggo ibunuh ras ipelimbaru. Alu sada tujun itandaina Dibata alu serta janah nggeluh bagi siniarapken Dibata. Tentuna enda labo dahin si menukah sabap arus iperjuangkan kalak si tek. Arus ngasup naluken sura-sura daging rikut ras kegoisenna. Keegoisen enda me si megati erbahan jabu la nteguh. Jelas kal, guna mbagun sada jabu iperluken dua kalak si erkomitmen, erjuang tapi adi ngeruntuhkenca sekalak pe banci. E maka duana arus rusaha mbangun ras njagai cinta, keleng ate, kesetiaan, kebujueren alu ngasup siergan ras ngaloken pasangenna kuga litna.

Bage me jabu-jabu kalak si tek si tetap arus mpelimbarui perukuren, cinta ras komitmen. Bagi nina syair lagu 'dikune pagi enggo urak kekelengenndu minter belasken sekalai nari perpadanenndu'. Si ngajuk kita gelah tetap nginget ras nggeluh i bas perpadanen si enggo sibelasken.